

阿文成公年譜

阿文成公年譜

兵部書兼都察院右都御史總督陝西學政兼提調餉務巡撫軍餉  
那彥成恭纂

勘定

原任刑部侍郎王昶

增脩

工部侍郎盧蔭溥

校定

御前大臣李少保領侍衛內大臣協辦大學士吏部尚書廂紅旗滿洲都統松筠

兵部侍郎兼都察院右副都御史巡撫西安等處地方提督軍務兼糧餉董教增

校對

江西等處提刑按察使司按察使何銑

戶

部

員

外

郎德克精阿

甘肅分巡蘭州道兼管驛鹽茶馬水利屯田事務嚴煥

甘肅分巡西寧兵備道龍萬育

陝西漢中府知府嚴如煜

原任戶部郎中祁韻士

戶部候補主事第二曾孫容安

乾清門三等侍衛第三曾孫容照

第四曾孫容恩

阿文成公年譜卷一

受業

王昶勘定  
盧蔭溥增脩

第三孫那彥成

纂集

公名阿桂姓章佳字廣庭號雲巖始祖穆都巴顏  
世居長白山之斐郎阿地方繼遷鄂謨和索羅

國初來歸正藍旗人以功升隸正白旗爲正白旗人

曾祖名雅爾泰

誥贈光祿大夫

經筵日講起居注官太子少保協辦大學士刑部尚書鑲

白旗漢軍都統翰林院掌院學士

晉贈光祿大夫

經筵日講起居注官太子太保武英殿大學士文淵閣領  
閣事管理吏部刑部戶部三庫衙門事務兼翰林  
院掌院學士

御前大臣領侍衛內大臣鑲黃旗滿洲都統一等誠謀英  
勇公會祖妣瓜爾佳氏

誥贈一品太夫人

晉贈一品公太夫人繼曾祖妣陳氏

誥贈一品太夫人

晉贈一品公太夫人祖名阿思哈

誥贈光祿大夫

經筵日講起居注官太子少保協辦大學士刑部尚書鑲  
白旗漢軍都統翰林院掌院學士

晉贈光祿大夫

經筵日講起居注官太子太保武英殿大學士文淵閣領  
閣事管理吏部刑部戶部三庫衙門事務兼翰林  
院掌院學士

御前大臣議政大臣領侍衛內大臣鑲黃旗滿洲都統一  
等誠謀英勇公祖妣葛氏

誥贈一品太夫人

晉贈一品公太夫人考名阿克敦康熙戊子舉人己丑進士改庶吉士散館授編修歷官刑部尚書協辦大學士

經筵日講起居注官太子少保鑲白旗漢軍都統翰林院掌院學士

誥授光祿大夫

諭祭葬

賜諡文勤

誥贈光祿大夫

經筵日講起居注官太子太保武英殿大學士文淵閣領  
閣事管理吏部刑部戶部三庫衙門事務兼翰林  
院掌院學士

御前大臣議政大臣領侍衛內大臣鑲黃旗滿洲都統一  
等誠謀英勇公妣宜爾根覺羅氏

誥封一品夫人

誥贈一品公太夫人繼妣那拉氏

誥封一品夫人

誥贈一品公太夫人生妣韓氏

誥贈一品公太夫人



康熙五十六年丁酉

八月初三日亥時生韓太夫人出

是年文勤公春秋三十有三任詹事府詹事秋冬

兩使朝鮮

五十七年戊戌二歲

是年文勤公任內閣學士兼禮部侍郎

五十八年己亥三歲

五十九年庚子四歲

六十年辛丑五歲

六十一年壬寅六歲

入家塾

是年文勤公任兵部右侍郎兼翰林院掌院學士  
奉使朝鮮恭遇

覃恩給子二品廕生

雍正元年癸卯七歲

二年甲辰八歲

是年文勤公奉使朝鮮

三年乙巳九歲

是年文勤公任禮部左侍郎仍兼兵部右侍郎

四年丙午十歲

是年文勤公以禮部左侍郎兼國子監祭酒調兵部左侍郎署理兩廣總督兼攝廣州將軍

五年丁未十一歲

是年四月文勤公調吏部左侍郎六月署廣東巡撫九月署廣西巡撫

六年戊申十二歲

是年文勤公罷職

七年己酉十三歲

八年庚戌十四歲

是年六月

誥贈一品公太夫人韓太夫人卒

九年辛亥十五歲

是年文勤公授內閣額外學士隨撫遠大將軍策楞從阿爾台一路出師

十年壬子十六歲

七月應試入學

是年十一月

誥封一品夫人

誥贈一品公太夫人那拉太夫人卒

十一年癸丑十七歲

是年文勤公隨定邊左副將軍策楞從黃雅舒魯克出師

十二年甲寅十八歲

歲試補廩膳生

是年文勤公辦理扎克拜達里大兵糧餉六月自軍營回京八月使準噶爾

十三年乙卯十九歲

選拔貢生

是年文勤公自準噶爾回京署工部右侍郎

恭遇

覃恩再給子二品廕生

乾隆元年丙辰二十歲

九月

恩科順天鄉試中式副榜

十月由廕生在大理寺寺正上學習行走

是年夫人瓜爾佳氏歸於公

二年丁巳二十一歲

三年戊午二十二歲

九月順天鄉試中式第十四名舉人座師吏部尚書孫嘉淦字錫山山西興縣人禮部侍郎吳家驊

字晉綺江南吳江人房師鄧時敏字遜可時官編修丙辰進士四川廣安人後擢大理寺少卿

是年文勤公以工部右侍郎使準噶爾議定地界四年己未二十三歲

六月補兵部主事

五年庚申二十四歲

六月陞兵部員外郎

是年文勤公任刑部右侍郎尋轉吏部左侍郎

六月第一子阿迪斯生

六年辛酉二十五歲

是年文勤公以吏部左侍郎兼理步軍統領事務

七年壬戌二十六歲

是年文勤公署正白旗漢軍都統

八年癸亥二十七歲

三月陞兵部郎中在軍機處行走

六月調補戶部顏料庫郎中

是年文勤公兼授鑲藍旗滿洲都統

二月第二子阿思達生

九年甲子二十八歲

是年六月第三子阿彌達生



附錄  
十年乙丑二十九歲

二月調補戶部銀庫郎中

是年文勤公掌翰林院學士充

經筵日講起居注官

十一年丙寅三十歲

六月降一級調用

七月補吏部員外郎

是年文勤公任都察院左都御史在議政處行走

尋任刑部尚書

十二年丁卯三十一歲

十三年戊辰三十二歲

正月

諭曰現在進剿金川兵部尚書班第馳驛前往其帶往之員外郎阿桂主事莊學和一體給與驛馬

是年文勤公協辦大學士

十四年己巳三十三歲

六月

諭曰岳鍾琪叅奏阿桂一案經軍機大臣會同刑部審擬定罪阿桂隨往軍營辦事年少無知自干罪戾固應按律重懲但伊係司員原不過以供驅使其獲罪之處與貽

悞軍務者有間情尚可原伊父阿克敦因子獲罪深知  
慚悔辦理事務甚屬黽勉且高年僅有此子拘繫囹圄  
別無左右侍奉之人朕爲垂憫著加恩將阿桂從寬釋  
放

是年文勤公加太子少保

賜紫禁城騎馬

十五年庚午三十四歲

四月

諭曰阿桂前因隨往軍營致獲重譴經部議治罪朕特加  
恩寬宥令伊父阿克敦約束教導阿桂從前獲罪尚非

身犯賊私者比伊向在司員中辦事黽勉且阿克敦僅此一子今再加恩著仍在吏部員外上行走俟有缺出題補

是年文勤公以協辦大學士畱京辦事

十六年辛未三十五歲

閏六月以員外郎兼郎中事

十月仍在軍機處行走

十七年壬申三十六歲

正月陞吏部郎中

二月兼戶部銀庫郎中

十月奉

旨郎中阿桂暫署江西按察使

時辦江西偽稿一案臬使丁廷讓解任來京故有是

命

十一月奉

旨補授江西按察使

公奏用法貴乎明慎決獄專忌淹留靖地方而清盜源云云

上嘉許飭部從之

十八年癸酉三十七歲

三月奉

旨來京補授內閣侍讀學士仍兼銀庫員外郎

是年七月子阿迪斯阿思達同入學

十九年甲戌三十八歲

四月仍兼戶部銀庫郎中

是年文勤公畱京辦事

二十年乙亥三十九歲

四月奉

旨補授內閣學士兼禮部侍郎仍兼銀庫事務

六月

諭曰烏里雅蘇台一帶所設臺站著內閣學士阿桂馳驛前往妥協查辦

先是準噶爾有四衛拉特未滅文勤公奉

命與議定地界途寧謚者幾二十年至是噶爾丹策凌死子策妄多爾濟那木札爾襲位其庶兄喇嘛達爾札執而篡之而巴圖魯渾台吉第七子布木之子大策凌敦多卜之孫達瓦齊復因和碩特拉藏汗之孫阿睦爾撒納計篡奪其位部落大亂所屬烏吉策凌伍巴什等詣關來降

上以侮亡取昧兵有常經乃先後遣將軍永常等督兵剿撫通阿睦爾撒納亦叛來降達瓦齊窮竄入回部爲回人擒獻

上封阿睦爾撒納爲親王使主故地已而阿睦爾撒納復叛走準噶爾逸賊亦北走

上命公赴北路烏里雅蘇台軍營與靖邊副將軍成衮扎布隨機搜討

七月軍機處議敘奉

旨阿桂著軍功加一級

是年正月文勤公以目疾請假至六月



予告以原官致仕

二十一年丙子四十歲

正月二十三日戌時文勤公薨春秋七十有二公

奔喪回京

二月

諭葬文勤公於左安門外之楊坊村

六月奉

旨兼管內繕書房

又奉

旨署鑲藍旗滿洲副都統

是年

王師辦理準噶爾

七月二十三日

諭曰據納穆扎爾奏青滾雜卜遣人至烏里雅蘇台煽惑喀爾喀等情形可疑等語青滾雜卜居心詭詐深可痛恨著舒明等詳細察看此時若已露背叛情形卽會同親王成袞扎布得親扎卜等相機擒拏若尚未生事端止宜畱心防範俟哈達哈撤兵回時再行辦理青滾雜卜游牧與唐努山甚近其或在游牧或向唐努山至烏梁海皆未可定亟著傳諭哈達哈臨期確訪或先撤兵

豫阻去路再行擒拏母得任其脫逃再貝勒策登扎卜  
呈稱不能辦理臺務必係聽青滾雜卜指使著一併拏  
解來京其臺站事務卽速交親王成袞扎布接續辦理  
毋致貽悞至哈達哈等自哈薩克回時馬匹不免疲瘦  
舒明等卽豫選馬匹善爲牧放俟哈達哈將到卽解往  
接續以增兵力並著內閣學士阿桂速赴軍營協同辦  
理

閏九月

公奏現在隨同將軍辦理情形

諭曰好加意奮勉如若僭越輕視將軍斷然不可

十五日

諭曰成袞扎布奏稱阿桂自到軍營辦理諸務甚屬盡心等語阿桂著授爲參贊大臣同將軍成袞扎布擒剿逆賊務宜加意奮勉以副委任

十二月二十日

諭曰北路軍營大臣應分駐地方辦理事務科布多地方著唐喀祿阿桂駐劄辦事並著郡王品級車木楚克扎布同往辦理舒明阿蘭泰著隨同副將軍成袞扎布在烏里雅蘇台軍營辦事

二十四日奉

附錄  
旨授鑲紅旗蒙古副都統

二十二年丁丑四十一歲

正月二十七日

諭曰前命阿桂赴科布多辦事今據將軍成衮扎布奏現在領兵前赴巴里坤所有烏里雅蘇台軍營事宜策布登扎布未能深悉暫畱阿桂令其詳悉告知等語科布多地方已命哈達哈前往駐劄阿桂著卽畱烏里雅蘇台辦事

四月初五日

諭曰哈達哈阿桂僅將會爾會等游牧收取首賊普爾普

德濟特克什克等俱已脫逃著交部議處

二十日

諭曰哈達哈阿桂前因疎縱首賊飭部分別議處今既經擒獲著加恩寬免

八月奉

旨補授工部侍郎

十月初九日

諭曰昨命將軍成袞扎布兆惠等來京籌議軍務著策布登扎布亦馳驛來京將定邊左副將軍印務交納穆扎爾署理阿桂著往代納穆扎爾莽古資著往代阿桂阿

桂不必候莽古賚卽前赴科布多辦事

二十三年戊寅四十二歲

正月二十一日

諭曰阿桂等奏稱和碩齊唐喀祿遵旨將哈薩克使臣送至邊界卽前往額爾齊斯之和尼邁拉呼布空郭勒地方堵截逋逃賊衆等語著傳諭和碩齊唐喀祿伊等口糧充足前至駐劄地方不可徒爲坐守須向各處巡查如有隱匿逃竄之賊卽奮勉擒剿勿致免脫

又

諭曰阿桂等奏據車木楚克扎布報稱莫尼扎卜等追剿

烏梁海鄂木布屬人一百餘戶惟五戶逃入俄羅斯界其餘俱行擒剿將婦女分賞烏梁海兵丁等語莫尼扎卜招服烏梁海頗知奮勉今追鄂木布屬人又能迅速奏功深屬可嘉

三月十五日

諭曰賊人舍楞將入俄羅斯恐科布多大臣文移遲緩傳諭阿桂行知和碩齊唐喀祿等倘有踪跡務畱意堵截擒拏

四月十九日

諭曰阿桂現在軍營不能辦理部務工部侍郎員缺著夢



麟調補阿桂遇有部院侍郎缺出再行補授

五月初一日

公奏言臣等因和碩齊唐喀祿等堵截沙喇壩勒

潰逃賊衆未得信息派侍衛奎薩等領索倫察哈爾兵前往策應奏入報

開

十七日

公奏言舍楞遣宰桑三人約降和碩齊唐喀祿領兵三十名往會舍楞伊等忽分兩翼衝擊與我兵互有殺傷卽添兵四百五十名起程策應務得和

碩齊等信息奏入

諭曰阿桂聞和碩齊唐喀祿爲賊舍楞所誘我兵失利之  
信卽領兵策應甚屬奮勉著加恩賞戴花翎逆賊狡詐  
如此情殊可惡傳諭策布登扎布計此時舍楞尚未入  
俄羅斯必擇地藏匿卽領兵速進與阿桂合力攻擊

十八日

諭曰阿桂昨奮勉遄行朕已加恩賞若得舍楞確信須量  
力而進倘賊勢頗強卽候成衰扎布等合力攻剿固不  
可輕身嘗試亦不可心存懼怯

二十一日

諭曰據策布登扎布等奏稱派喀爾喀公品級達什等搜捕空格斯附近逸賊俟回兵後再遵旨前至塔爾巴哈台探叛賊舍楞所向等語伊等從前初聞舍楞逃信若卽行尾追又有和碩齊等堵截必爲我兵擒獲何至有約降失利之事今舍楞已遁逃兩月餘此時豈尚在塔爾巴哈臺坐待追兵耶現在阿桂及成袞扎布俱前往策應可傳諭策布登扎布惟速赴額爾齊斯會同剿賊不可派員前往

二十七日

公奏言和碩齊更衣走入賊隊唐喀祿業已被害

臣等仍策應侍衛奎薩營總班珠爾等速追舍楞  
奏入

諭曰據阿桂奏報和碩齊唐喀祿等爲賊所誘唐喀祿被  
害和碩齊更衣降賊等語唐喀祿奮勇捐軀深可憫惻  
其餘陣亡得傷官兵著阿桂查明送部分別議敘議卹

又

諭曰阿桂領兵速追逆賊尚屬奮勉若舍楞未入俄羅斯  
務宜體察賊勢相機擒剿或需增兵卽知會成袞扎布  
前往接應阿桂仍候辦理哈薩克錫喇布庫察罕事竣  
再行撤回成袞扎布此時暫駐科布多候信其脫出得

傷官兵阿桂卽量加賞給令其游牧休息

六月十四日

諭曰叛賊舍楞等計此時已竄入俄羅斯布空郭勒等處亦未必有逃來之厄魯特阿桂在彼堵截徒糜糧餉著傳諭成袞扎布阿桂等若阿桂報稱舍楞尚未遠竄成袞扎布宜速行策應如未得信息卽不必前往仍回科布多駐劄阿桂奉到此旨亦視舍楞之遠竄與否若賊衆已過無復逃來之人卽派兵嚴密搜捕遇有瑪哈沁俱行剿殺以十五日爲期亦回科布多軍營仍將現在堵剿情形作速奏聞

三十日

諭曰阿桂奏稱詢問由逆賊舍楞處脫出之厄魯特鄂勒  
椿謂舍楞不能入俄羅斯將由哈薩克逃往土爾扈特  
或又不能達恐復回準噶爾藏匿必在輝巴朗經過一  
面派兵於彼處守候仍採取實信若已入哈薩克相距  
甚遠卽帶兵索取候其擒送等語從前成袞扎布詢問  
鄂勒椿後卽行奏聞朕因鄂勒椿過阿桂軍營曾給以  
口糧阿桂自應一面具奏一面領兵速追舍楞方可得  
真實信息乃成袞扎布又續奏舍楞入俄羅斯之信而  
阿桂始以鄂勒椿所告奏聞且稱舍楞若逃去已遠不

能追及卽在哈薩克邊界駐候擒送更屬錯謬阿桂初次領兵理應奮勉乃卽如此觀望遲延著傳旨嚴行申飭

七月十三日

諭曰據成袞扎布等奏接阿桂咨稱已往追策布登扎布俟會齊後偵探舍楞所在協力擒拏如已入俄羅斯亦公同商辦領兵前進等語覽此奏阿桂距策布登扎布之隊僅有四五日之程自應速往協捕至成袞扎布不必往會仍照前旨於俄羅斯邊界索捕舍楞

十八日

諭曰據策布登扎布等奏稱與巴祿同追舍楞至古爾班  
察爾與阿桂合兵知舍楞已入俄羅斯隨派副都統鄂  
博什等前往索取又前遣往哈薩克索取布庫察罕之  
納旺等尚未回報因以阿桂暫行駐候巴祿仍巡查臺  
站等語所辦尚合機宜朕前屢諭策布登扎布策應富  
德計奉到此旨時阿布賚已將布庫察罕縛送策布登  
扎布卽同阿桂前往與富德合兵向阿布勒噶爾索取  
哈薩克錫喇如飾詞延緩或這屆撤兵之期亦卽相機  
酌辦頃已諭副都統德爾素爲參贊大臣在科布多辦  
事阿桂不必回科布多倘業經轉回卽來京請訓



二十六日

諭曰阿桂奏暫於布空郭勒等處駐候信息阿桂既與策布登扎布合兵自宜同往策應富德以爲効力之路何必分道却回著傳諭阿桂如未至布延圖則仍追及策布登扎布同行如已離布延圖不遠卽令官兵回營阿桂作速來京請訓再赴西路

八月二十四日奉

旨補授工部侍郎

九月二十七日

諭曰北路之塔爾巴哈台亦宜防守所餘索倫兵一千擬

令阿桂帶領駐劄

二十九日

諭曰阿桂奏來京請訓馳赴西路軍營酌派所領侍衛官員二三名索倫兵二十餘名將行裝自布延圖先送至巴里坤等語阿桂所領官兵自應調回休息可傳諭阿里袞伊等抵巴里坤卽派官兵照看行裝令其由臺站各回游牧休息以示體卹

十月回京

十一月奉

旨仍赴西路與副將軍富德合兵追捕準夷餘孽

是歲準部平

二十四年己卯四十三歲

三月二十六日

諭曰吏部開具在京部院三品以上官請旨甄別以重察  
典現在辦理軍務之侍郎阿桂身歷行間勤勞可念著  
交部議敘

四月初三日

諭曰前諭福祿不必在參贊上行走今著仍其舊任昨又  
命明瑞爲參贊大臣計伊等兩隊參贊大臣富德處較  
少著阿桂在伊隊內行走

五月奉

旨阿桂著前往霍斯庫魯克同副將軍富德剿辦逆回

八月十五日

公偕富德等奏臣等於七月初九日追賊霍集占

等至阿勒楚爾賊伏於兩山間臣阿桂率領隊大

臣等兩翼衝擊賊大潰攻奪山峯計殺千餘人生

擒五十餘人奏入得

旨交部從優議敘

又

命賞荷包鼻煙壺

二十三日

定邊右副將軍富德等奏臣等乘勢追剿行至巴

達克山界逆賊霍集占猶在山頭攔阻臣阿里袞

帶兵追賊富德巴祿阿桂等隨後策應奏入報

聞

二十四日

公偕富德等奏言臣等於七月初十日追賊至伊

西洱庫爾淖爾見賊先據山麓我兵向上衝擊回

衆均同聲願降逆賊霍集占猶在山頭攔阻殺死

多人而降者益衆臣阿桂等領兵進剿在東山一

帶分地設伏防賊逃竄臣阿里袞選兵二百餘名  
於十二日過嶺尋踪追剿臣阿桂等卽領馬步兵  
四百餘名亦於十二日起程策應阿里袞奏入報

聞

是月回部平

御製詩有偏伍彌縫密佈置發縱指使皆英賢之句副將軍富

德與霍集斯等統中軍令參贊公明瑞阿桂等領左翼  
參贊阿里袞巴祿等領右翼翼之中各分前中後隊又  
益以奇兵援兵隊各爲二別遣巴圖魯侍衛額爾登額  
等分率巴圖魯兵二隊備四面應援而領隊齊凌扎布  
爲殿軍將卒如臂  
指相維佈置實當

九月十三日

諭曰著阿桂前往阿克蘇辦事

十月初二日

諭曰舒赫德奏伊前往葉爾羌辦事將欽差大臣關防帶往其阿克蘇應請給以關防至葉爾羌距內地甚遠奏報事件宜加慎密請賞給奏匣等語阿克蘇爲回城要地已派阿桂駐劄辦事著該部覈送欽差大臣關防一顆以昭信守其賞給葉爾羌奏匣亦照所請行

十二月二十日

諭曰阿桂奏現在阿克蘇拏獲厄魯特匪犯三名皆官兵隨僕盜馬潛逃業經正法等語此等厄魯特皆剿戮之

餘惡習未改阿克蘇既經拏獲則沿途有脫逃者著通諭哈密等處大臣務宜畱心拏獲訊明正法

公奏言

臣

到阿克蘇查看牧羣牛羊除從前解往

葉爾羌一萬餘現存牛三十二頭羊一萬五千三百餘隻竊思來年伊犁駐防官兵所需糧餉須待回人收穫後方能支給其起程時所需行糧必須牛羊添補

臣

已飭該管官兵加意牧放以濟軍需

奏入報

聞

二十九日



諭曰阿桂奏稱兆惠等經過阿克蘇會議伊犁駐兵及遷移回人屯田事宜從阿克蘇烏什賽哩木拜城庫車沙雅爾等城酌派回人二三百戶於來年二月間先遣丁壯前往屯田以官兵五百名護送起程俟青草發生再將回人家口遷移等語所議尚屬可行兆惠此時雖未具奏卽應如此辦理至屯田回人需兵彈壓自阿克蘇至伊犁安臺傳事聲息相通最關緊要著傳諭舒赫德阿桂今大功告成巴達克山霍罕等部落悉皆歸附則葉爾羌自可安靜無事且有額敏和卓在彼海明又已前往舒赫德候其到時卽回阿克蘇駐劄辦理阿桂伊

柱卽領駐防兵丁護送回人往伊犁管理屯田事務至官兵等居止自必相度地勢安營立寨土木之工以漸興作期於堅固久遠所請備造帳房原非可以常用不過自阿克蘇至伊犁沿途住宿及初到時不致露處耳所有應行事宜俱著伊等會商辦理

二十五年庚辰四十四歲

正月初八日

諭曰昨諭舒赫德等派豐訥亨領兵於阿勒坦和碩等處搜捕戕害德舒賊人今思阿桂伊柱雖派辦護送回人前往伊犁屯田尚需時日著先派官兵五百名同豐訥

亨等搜捕瑪哈沁務宜協心奮勉以清方域

十五日

公奏言

臣

前會議挑派阿克蘇烏什賽哩木拜城

庫車沙雅爾等處回子三百戶挑派哈拉沙爾庫爾勒等處回子二百戶共五百戶於明歲二月內起程派兵五百各給馬匹一同照料行走於青茂後移駐回子戶口時再派兵五百同往將補給兵丁馬匹牲畜由巴里坤等處辦理運送等議在案此次應派回子大半均係

臣

屬城內者此行兵丁

亦定由阿克蘇辦理起程但日期迫急恐至遲悞

未能候將軍等與楊應琚會議前來臣先差侍衛

官兵等將驢壯馬匹駝隻趕赴山內有水草處牧放以備屯兵之需但駝隻不能多駝米麪因將所有羊隻揀上好者亦趕赴山內牧放以備屯兵口食之需再屯兵應備帳房軍器等項均經陸續奏聞至伊犁地方於何月起種移屯回子等令於何月起程應由何路行走作為幾站可抵屯防並將屯田人等自起程之日起至收穫之日止應備口糧若干籽種若干所需農器鑼鍋牲畜作何領給臣詢問伊什罕扑鸞據伊等會呈此去必由穆蘇爾嶺路

徑行走由阿克蘇行走七站過嶺又行七站過察  
布沁嶺再一站即可抵伊犁賽音舊村屯田地方  
將明歲種田人等卽屯駐此處伊犁地方均係三  
月內耕種今於二月十五日以內起程於三月初  
旬行抵該處正可耕種不至遲悞此行若係烏什  
回子來抵阿克蘇會同前往若係庫車沙雅爾拜  
城賽哩木人等當至阿拉布地方會同前往種田等  
七月時收穫糧石每人各領給口食四十分籽種四  
十分五人領給鍋一口鑊斧各一把二人領給鑊  
刃各一張每人領給犁一張鐮刀一把並酌計駝

載籽種口食農器牲畜各三頭若有駝隻酌給一  
駝二牲畜搭配一驢共計牲畜四頭若無此項牲  
畜伊等難以行走將此項牲畜均畱該處則此處  
可以不必領給種田牲畜因此我等所派從人送  
抵該處與屯田人等各畱牲畜一頭其餘均各帶  
回耕種至於移駐眷口之事隨時再議等呈前來  
臣看得回子等幫助雖略爲作難若將應禁約者  
禁約鼓勵者鼓勵則此數城三百戶內人等仍可  
令其起程但將軍等議定將此處派回子若干尚  
未咨行前來是以將應派回子亦未派定若俟將

軍等議妥咨覆到來尚有二三十日之隔則各城均可到齊於起身時亦不至遲悞今蒙降

旨垂詢臣謹將實在備辦緣由奏

聞以臣愚見雖不拘何時定當遣赴伊犁屯防但今初創之始卽宜將此移駐之數百戶回民辦理妥就若將移駐回子暫行停止僅派兵一千前往巡查地方雖所需馬匹牲畜口糧勉強支給至明歲若不耕種待至來年愈不能多遣人往屯所今卽辦理此一千兵丁費用不過領給數月口糧儘可支持至收穫糧石之日且明歲回子已經耕種妥協俟

來年再爲加增兵丁及同子等屯田甚覺便易應  
請早爲撥調奏入

諭曰據奏伊犁駐防屯田皆必需辦理之事若酌派回人  
先往屯田再添駐官兵增派回衆卽易爲力請早爲撥  
調等語具見勇往任事阿桂若現在辦理有緒且確見  
必須屯田卽酌量帶兵前往

二十三日

諭曰阿桂所奏將軍等於逕過阿克蘇時會議將阿克蘇  
烏什賽哩木拜城庫車沙雅爾等城所派二三百戶人  
等令於明歲二月內先往伊犁屯田隨派兵五百各領



給馬匹一同照料起程於青茂時再將回子戶口移駐一摺伊等所議尚是兆惠等雖未具奏前來此時亦當如此辦理著舒赫德毋庸在葉爾羌屯駐卽來阿克蘇由阿克蘇至伊犁安設臺站將移駐回子兵丁等項事件妥爲辦理著阿桂伊柱至伊犁之日卽帶領兵回等選地安設窩鋪居住若獲有木植脩理房屋居住愈善若如此防守堅固可以久遠居住且不致需費帳房但伊等已經將帳房製造完竣可令帶往節省使用舒赫德阿桂接奉此旨將移駐回子並屯兵作如何議定辦理遣往之處一面具奏一面令其起程

二月初三日

諭曰日昨努三等將伊等起程之處具奏到來時朕因搜剿瑪哈沁之德舒在於阿木坦和碩地方被害曾降旨差派豐訥亨帶領索倫蒙古兵丁二三百名奮勉前往查拏賊人但前降旨令阿桂伊柱帶領兵丁同子等前赴伊犁屯田因與查拏瑪哈沁均係一事阿桂係辦過此事之人是以著阿桂會同豐訥亨前往查拏瑪哈沁等於捉獲時卽由彼前赴伊犁則於事有益前次阿桂赴伊犁之時曾帶兵五百名今阿桂同豐訥亨捉拏瑪哈沁亦卽帶領索倫蒙古兵五百前往伊等宜同心勉

力將瑪哈沁卽速拏獲以靖地方若該處所需馬匹不敷將巴里坤現有牧放馬匹飭交伍吉挑選肥壯馬二千卽親身帶領官兵護送至阿克蘇備用將此諭知阿桂伍吉欽遵辦理

初六日

公奏言從前總督楊應琚來抵阿克蘇與將軍會商因哈拉沙爾庫爾勒之回子力量不加本年移駐之處未能備辦定於明歲派兵四五千並派移駐回子戶口一千是以將本年移駐回子暫行停止但臣已派定阿克蘇回子一百三十八戶諸項均

預備妥協將烏什一百零三戶回子已交該伯克等承辦至庫車沙雅爾賽哩木拜城等處雖未備辦但每城可得十戶亦不爲難

臣接奉

諭旨一面飭交阿克蘇伯克等將派赴伊犁屯田回子所需牲畜口糧籽種農器等項務於二月十五以內辦理妥協以俟起程一面咨行烏什庫車亦各照此辦理務於二月十五以內備辦妥協俟擇定日期另爲咨行起程

臣

將伊犁耕種時節向回子等詢問據伊等回稱或言趕上耕種者或言過期者

所論不一是以咨行舒赫德等將赴阿克蘇兵丁

未派恐葉爾羌等城兵丁到時是否有悞耕期咨  
商舒赫德等再將原在伊犁屯田回子等詢明於  
該處所派兵丁到來回子亦可預備妥協茲准舒  
赫德等來咨將諳悉伊犁種田之人詢問據稱伊  
犁地方於三月底四月初旬凡粟米糜子蕎麥等  
糧均可趕種是以差派索倫兵二百察哈爾兵一  
百令伊柱帶往阿克蘇臣阿桂將阿克蘇所有兵  
丁再加派二百共爲五百照料屯田回子等前赴  
伊犁緣由具

奏咨行前來查各處派定屯田回子經臣不時行催

均令於二月十五以內預備妥協已定限期至伊  
柱所帶兵丁於二十間始可到來臣將應派兵丁  
以及辦理所需馬匹駝隻口糧等項均已預備妥  
協酌計兵丁等到來二三日即可令其起程上緊  
辦理不至遲悞再查派兵照料回子等前赴伊犁  
屯田及搜剿瑪哈沁等亦係一併應辦之事但所  
有馬匹駝隻現在疲瘦雖急緊收放舊草尚未發  
生暫且設法每兵領給馬一匹不過將就可到伊  
犁至伍吉所解馬匹暫時不能到來若候此項馬  
到始帶領屯田回子等起程必至有悞種田之期

是以臣於耕種之期以前先令起程以期奮勉搜  
拏瑪哈沁以靖地方俟隨後將辦理情形另行陸  
續具奏奏入

諭曰阿桂奏接准舒赫德移開將所派各處屯田回子並  
由阿克蘇所派兵丁均已備派妥協以及伊桂所帶兵  
丁到來一二日內卽酌令起程現在督辦均無貽悞但  
赴伊犁屯田並搜剿瑪哈沁均係併辦之事現有之駝  
馬廐分均屬疲瘦伍吉運解馬匹暫時不能到來若候  
此項馬匹卽悞種田時期是以通融辦理每兵各領給  
馬一匹親身先行帶領起程竭力搜剿瑪哈沁等語阿

桂所辦奮勇可嘉卽如此辦理因先將伊犁屯田事務  
停止將搜剿瑪哈沁之事作爲緊要今再將屯田事亦  
應辦理旣將阿克蘇現有馬匹與屯兵各領給一匹將  
就可至伊犁阿桂先爲帶領起程甚是若伍吉將馬匹  
運到暫令牧放俟種田事竣再前往搜剿瑪哈沁亦不  
至遲悞將此諭知阿桂等此際將屯田回子及屯兵卽  
先帶領起程若伍吉將馬匹運到阿桂尚未起程阿桂  
卽帶領照料前往愈善若伍吉未到阿桂已起程將畱  
後搜剿瑪哈沁之兵丁馬匹俟舒赫德來抵阿克蘇卽  
將此項馬匹接收飭交搜剿瑪哈沁之兵丁照料運交



阿桂處若搜剿瑪哈沁之兵丁尚未前往或不得蒞任帶兵大員舒赫德務宜妥爲辦理差派大員帶兵運送始善如去歲德舒遇害因瑪哈沁賊匪等卽由木蘇爾嶺路逕前來此時我兵過後賊匪又復前來均未可定舒赫德將運送此項馬匹務宜細心辦理就近或調派領隊大臣或營長一員將馬匹兵丁照料護送中途遇賊不至丟棄妥送阿桂處阿桂收獲此項馬匹時暫尋有水草處牧放俟臆壯於七八月內再前往搜剿瑪哈沁但我兵係照料屯田回子者若於屯田事竣不可將兵丁全行帶往搜剿瑪哈沁務視便畱兵照料屯田回

子始善此行阿桂毋庸前往著伊桂帶兵前往可也伊犁現係始設屯兵耕田嗣後每年卽陸續添耕將如何過冬明歲又如何添耕之處均由阿桂與舒赫德會議辦理阿桂抵伊犁之日將屯田事務辦妥將錫伯如何結固與兵丁修葺房屋過冬明歲如何添耕之處當與舒赫德盡心會議辦理再令回子等於種田之暇並將脩葺葢房屋等項事務若作伊等差務則伊等甚爲勞苦便中當與伊等稍施恩惠則伊等卽互相鼓舞樂於脩葺矣阿桂當盡心辦理茲令安泰帶兵三百前赴與阿桂會哨搜捉瑪哈沁已經降旨令其赴伊犁屯兵等前

往路逕務於通衢安設軍臺似毋庸會哨安泰僅帶兵  
前往伊犁將屯田形勢閱完卽宜旋回由何路安設軍  
臺之處畱心閱看妥協奏聞若沿途遇有潛匿瑪哈沁  
賊匪卽行搜剿

公又奏言本年辦理赴伊犁屯田回子盆照料兵  
丁令其速往特爲立基以便明歲易於開廣臣欽  
遵

諭旨選擇地方安設莊屯自應相其形勢辦理臣隨喚集  
諳曉伊犁地方情形之厄魯特回子等詳加詢問  
得伊犁河之南有霍吉集爾海努克奇特木等地

方三處河之北有固勒扎霍爾果斯察罕烏蘇等  
地方三處均係先年回子等種田之所查由阿克  
蘇赴伊犁時因伊犁河南岸崩塌一處渡過伊犁  
必需數日脩造船隻查海努克亦係伊犁有名地  
方且田地寬廣與固勒扎相隔一日之遙若迅急  
耕種卽在海努克屯駐耕種安設莊屯均經臣酌  
量形勢辦理至帶來三百回子內並無伯克頭人  
因不可無人約束臣視便由阿克蘇帶來伯克一  
二名由庫車拜城賽哩木各派伯克一二名以令  
照料種田回子至伊犁於種田後將伯克應遣回

者遣回畱駐者畱駐以資約束三百回子仍於每  
百內放什長一名以令管轄於明歲再遣回子之  
時卽移知舒赫德將應放之阿奇木伊什罕商伯  
克哈子人等一併挑選咨送前來至收穫糧石宜  
設立碾磨於本年收成後將應脩之倉廩牆院等  
項均於種田之暇辦理脩治但此項事件滿蒙兵  
丁多有未諳隨於此五百兵外又派綠營兵一百  
名差都司一員千把總數員帶來以備使用將此  
卽入於帶來之五百戶口數內今將應派之五百  
兵丁經舒赫德派索倫察哈爾兵三百名交伊柱

帶來臣處所有索倫察哈爾兵丁應差二百名因  
數目不敷將健銳營滿兵挑派充入數內將場內  
所有數百馬匹按兵丁每人領給一匹三人領給  
駝一隻所有伊柱帶來兵丁若未經辦理領給臣  
亦照此處領給駝馬若馬匹多有不能行走二十  
日者臣再令回子等奮勉辦理起程後本處口糧  
暫難運送今於起程以前各領給乾麪羊隻帶往  
俟收穫新米麪時再爲酌散尚需兩月口糧俟後  
來之回子入戶兵丁之便再爲運至將所缺軍器  
均由阿克蘇庫內領給於未起程之前派兵帶領

回子先赴穆蘇爾嶺脩理路逕以資大隊過境再查從前準噶爾有由拜城派往回子三百戶因無官差是以派回子三十名長川脩理山嶺路逕今因脩理山逕特由阿克蘇差回子六十戶前往嗣後將如何脩理山逕益如何安設軍臺以通信息之處咨行舒赫德酌量辦理俟伊柱之兵到來令其起程奏入

諭曰阿桂奏伊犁河之南地名海努克地勢寬濶且距固勒扎一日之遙急於耕種卽在於海努克地方屯種指選地方相形安設莊屯等語阿桂所辦甚屬盡善將屯

田回子等屯駐海努克指選地方安設莊屯之處均照  
阿桂所奏辦理伊如果均辦理盡善伊犁初創屯田之  
事卽是阿桂之功績再屯田回子於安設莊屯屯駐之  
時則照料屯兵在所必需當將屯兵等所居地方務尋  
覓結固錫伯安設卡倫屯駐以嚴防瑪沁之哈薩克  
等方善至脩理穆蘇爾嶺之處亦降旨舒赫德矣將此  
一併諭知

初八日

諭曰阿桂等奏稱伊犁屯田原議今歲添兵五百名同人  
三百戶前往今與楊應琚相見始知將軍等酌議派兵



四五千名回人一千戶但阿克蘇回人業經預備而庫爾勒等處所派尚未辦理仍俟楊應琚到葉爾羌時與舒赫德定議等語伊犁向爲準夷腹地加意經畫故積事頗脩今歸我版圖若不駐兵屯田則相近之哈薩克布魯特等乘機游牧又煩驅逐大臣等自當辦理妥協不可苟且塞責以圖早歸看來駐兵屯田惟當漸次擴充今歲且照原議派兵五百名回人三百戶或并此俱行停止來年再爲舉行則我兵旣得休息而回人生計亦稍寬裕又可量爲添派以漸增多此事朕惟責之舒赫德伊不過於用兵時退縮至於辦事心細朕所深知

若果盡心自能辦理今雖新桂前往協辦究未熟悉舒赫德惟視若已事辦理妥協方准其更換此時應作何辦理伊前奏多添兵丁回人及河船糧運經朕訓飭何以尚未覆奏俱著傳諭知之

十一日

諭曰伍吉奏稱派往阿克蘇之馬二千二百餘匹伊親行解送於正月二十八日自巴里坤起程等語以阿克蘇現有馬匹駝隻合之新到馬匹自足敷用著傳諭阿桂伊柱豐訥亨卽選派官兵給以馬匹搜捕瑪哈沁務期一舉盡剿亦不必過於急迫惟酌量馬力奮勉行走

十二日

諭曰阿桂奏稱辦送霍集斯之子呼岱伯爾氏同其家口來京等語著傳諭阿桂霍集斯家口起程時將伊兄弟之家口及同族皆毋庸辦送

十三日

諭曰阿桂奏稱辦送漠咱吧爾兄弟等來京時體察阿克蘇回人伯克等稍生疑懼業經出示安慰等語所見甚是今仍降旨宣諭著舒赫德等通行曉示各城再阿桂奏遵旨派索倫兵三百名前往烏魯木齊酌於二月初旬起程等語阿克蘇等處索倫兵旣行派出而阿桂巡

查伊犁又必領兵前往則阿克蘇之索倫兵益少現在  
回人不無疑懼亦須彈壓著與舒赫德酌議或調葉爾  
羌索倫兵二三百名駐劄阿克蘇或令安泰選索倫兵  
一百名由烏魯木齊前往伊犁阿桂等由穆蘇爾領與  
安泰會合亦甚有益伊等宜會商妥協一面辦理一面  
奏聞不必候旨至阿克蘇辦事甚要阿里袞現在起程  
來京可就便暫駐阿克蘇俟阿桂巡查回日再行起程  
現今新柱往葉爾羌協辦著海明卽至阿克蘇阿里袞  
俟海明到日再行回京俱著舒赫德阿桂酌議具奏

十八日

諭曰舒赫德奏阿克蘇現有索倫兵二百六十餘名又於齊凌扎卜所領新索倫兵內揀選三十餘名發往烏魯木齊等語阿克蘇地方緊要今所有索倫兵既全往烏魯木齊而阿桂又領兵巡查伊犁自應派兵防範乃舒赫德未見奏及若謂伊所駐葉爾羌之兵不便撥調阿克蘇則甚屬錯謬伊係總辦各城事務之人自當視同一體不可稍分彼此至阿桂亦未奏明巡查伊犁係派何處之兵而阿克蘇以何處兵丁駐劄自當辦理妥協再烏什雖與阿克蘇相近仍須大臣駐劄辦事著舒赫德等酌量辦理阿桂亦不得因總理有人遂生推諉當

與舒赫德和衷商榷以期集事倘互相推諉以致貽誤  
朕不獨責備一人也俱著傳諭知之

十九日

諭曰阿桂等奏准永慶呈報烏什之阿渾伯克等列款控告霍集斯並稱葉爾羌噶雜納齊薩里行走奮勉若授爲烏什之阿奇木殊屬妥協隨示以薩里縱可委用究係本城之人豈此外無可勝任者且補授阿奇木我等尚不敢專擅爾輩何得薦舉等語阿桂所奏曉示回人之處甚是薩里曾控告霍集斯若卽授爲阿奇木則奸險之徒羣以陷人奪缺爲得計伊果行走奮勉應再行

酌量加恩至所奏噶岱默特可勝阿奇木之任伊現隨將軍等來京俟召見後再降諭旨

二十日

諭曰定長等奏准阿桂咨查霍集斯有畱於吐魯番之人差遊擊達興阿嚴加看守安插魯克察克又漠咱帖爾從前差往開展購買什物之人亦行文書山納世通詳查具奏等語大臣等於應辦要務往往畏難而此等毫無關係事件輒瑣屑搜求甚覺過當定長卽准咨辦理俱未曉事霍集斯効力軍營尚欲加恩錫爵其安插京師者特恐仍居故地爲人所累原以曲示保全故賞給

廩祿務從豐厚何必羈其屬人查其什物耶且辦理此事當明白曉示以霍集斯被人告訐大皇帝念功宥罪安插京師卽伊存畱之人疑懼逃竄不妨聽其所往而代伊市買之人縱有侵漁亦何必過問阿桂定長俱著傳旨申飭仍降旨曉諭同人等其霍集斯所畱之人可自備資斧來京至霍集斯家產力能自運則已或有不  
能則官爲幫辦阿桂等卽遵照辦理

三月初九日

諭曰阿桂奏稱官兵回人過穆蘇爾嶺時卽領兵二三百名在呼爾岱等處搜捕瑪哈沁令伊柱先往海努克督



課回人耕作若豐訥亨已到卽與同行否則暫畱阿克蘇俟伍吉送馬到日續來接濟等語所辦甚是伊犁辦事需人常亮現在丁憂來京著卽帶關防馳驛前往交阿桂收掌協同辦事又所奏圖桑阿固世衡現在葉爾羌請派調一員等語俱著前往伊犁協辦又所稱官兵行糧例載滿洲索倫等兵丁月支羊三隻綠旗兵月支羊二隻現在伊犁未通貿易綠旗兵於開墾營造亦屬勤勞請一體支給等語著照所請行

十九日

諭曰阿桂奏稱現在辦理屯田兵丁回人等於二月二十

五日起程陸續行走至阿克蘇督辦農具又湊出馬匹之伊沙噶頗拉特烏什辦事之葉爾羌噶雜納齊薩里等各賞給緞匹等語阿桂此次奮勉辦理甚屬可嘉至巡查塔爾巴哈臺以屯田餘力酌量辦理不必過於急速

二十四日

諭曰成袞扎布奏據薩拉布拉克卡倫送到從哈薩克脫出之厄魯特和屯博勒等告稱現在哈薩克等游牧已遷移塔爾巴哈臺又聞伊等因巴魯克巴圖魯掠搶烏梁海一事恐大兵查拏致累議令將人丁牲畜送還倘

仍不從卽當擒獻等語哈薩克遷移游牧之信其果否  
雖難遽定但伊等部落人衆素未約束或有數戶人口  
潛來居住亦未可知著傳諭阿桂酌派官兵數人往探  
虛實伊等果有踪跡卽曉譬利害諭以此地爲天朝平  
定將來辦理駐兵爾等從前在準噶爾時尚不敢越界  
此時豈可私行游牧立行驅逐出界併傳諭納旺見阿  
布賚時務卽索取掠搶烏梁海之人或探知塔爾巴哈  
臺有哈薩克等亦卽以此意曉示阿布賚令其移回俱  
著相機辦理

四月十七日

諭曰阿桂奏稱領兵過穆蘇爾嶺前抵特克斯伊分兵二百五十名往阿勒坦和碩之阿圭雅斯等處搜捕瑪哈沁餘兵護送回衆往海努克屯田等語阿桂前奏領兵往塔爾巴哈臺堵截瑪哈沁等彼時因烏梁海被掠一事未知確實故由北路派兵令策布登扎布帶領在塔爾巴哈臺堵截今已稔知哈薩克巴魯克巴圖魯所爲遣使往索停止進兵阿桂亦可俟來年有暇再往巡查從前阿桂議奏兵數僅五百名今年屯田收穫若不能給千人之食亦須預爲籌畫並傳諭阿桂現駐兵丁準收穀石數用與否如有不敷卽將餘兵發回阿克蘇等

處度歲亦可且接濟口食之牛羊併須乘時送往庶不致冒寒行走徒多傷斃舒赫德等當會商辦理

又

諭曰阿桂奏伊領兵往阿圭雅斯一路此時安泰若卽前來尚可會合但行文未能卽達不便守候請令伊在伊犁附近搜捕後卽由博羅布爾噶蘇直抵伊犁等語前諭伊等會兵特欲其兩路合圍同至伊犁並非謂伊等但一合兵便可了事也安泰此時已抵博羅布爾噶蘇亦未可定伊等宜互相探聽隨便會合惟以搜捕盡淨爲要至辦理瑪哈沁與前此情形不同現在逃往哈薩

克之厄魯特等多以困苦來投或藏匿山谷以丐餘生亦不必盡行剿殺當酌量招撫其台吉宰桑之可疑者解送京師餘人分別安插以供差遣并須豫爲曉示則降者必多否則伊等妄生疑懼或以死守或逃往他處乘間滋擾臺站俱未可定此內若有哈薩克錫喇等要犯斷不可疎脫亟傳諭安泰加意奮勉從事

五月二十八日

諭曰哈薩克使人瑚圖拜阿塔賚等奏稱厄魯特之地現俱開曠我哈薩克人等有在塔爾巴哈臺庫克烏蘇淖爾渾巴爾魯克阿勒坦額默勒等處駐牧者我等皆天

朝臣僕懇恩准至伊犁游牧等語從前阿布賚請於塔爾巴哈臺等處游牧曾經降旨曉諭今據來使所奏則伊等已漸次闌入自當驅逐現在頒給勅諭不允所請著傳諭阿桂等暫停搜捕瑪哈沁以巡察邊界爲由領兵四五百名前往塔爾巴哈臺等處遇有哈薩克人等在彼駐牧者卽明切曉諭小伊等如果及時移出則已或有意推諉遲延卽應懾以軍威但不得遽行縱兵俘獲阿桂一切可相機妥協辦理此行兵數不宜太少倘不敷用卽合之安泰所領兵又得四五百名可以號稱二千其如何與安泰寄信各兵并約計休息馬匹二十日

一同起程之處俱著酌議奏聞

二十九日

諭曰伊犁新墾駐設兵丁事宜皆關係緊要將此傳諭阿桂卽將本年伊犁屯田於七月初旬看其秀實約計可收分數若干先行奏聞

又

諭曰阿桂至伊犁辦理種地之事已定之後如何備辦兵丁等過冬明年如何添益種地之處據實覆奏

公奏籌辦收厰查看臺站搜捕瑪哈沁諸事宜輪流管理奏入



諭曰甚是汝於是役諸處皆能奮勉可嘉益勉爲之

六月初四日

諭曰阿桂奏稱領兵搜捕瑪哈沁至阿圭雅斯等處據侍衛喬蘇勒等於呼爾岱見有賊蹤收獲男婦二十六名口又至都木丹濟爾哈朗侍衛碩通等搜剿樹林賊衆收獲馬匹旋有藏匿賊匪前來爭奪獎賞藍翎鐵柱等沿途共殺賊三十餘名得馬三百五十餘匹察哈爾署參領策凌旺布及兵丁三名陣亡又得傷兵丁四名等語此次搜捕瑪哈沁官兵甚屬奮勉俱著造冊送部議敘議卹至阿桂等既經捉生詢問仍領兵與安泰同往

阿勒坦特卜什阿呼喇哈爾海搜捕搶掠布魯特馬匹  
賊人及在庫車搶掠臺站戕害德舒之賊人塞卜騰霍  
濟格爾等著給發孔雀翎五枝藍翎十枝以備獎賞仍  
暫停搜捕瑪哈沁卽巡查塔爾巴哈臺驅逐哈薩克人  
等又據奏此行未設臺站俟事竣後奏報等語未免聞  
信遲緩可傳諭舒赫德著豐訥亨選派幹員領兵二三  
十名前往阿桂處通信所有辦理情形阿桂卽令齎回  
奏聞

公奏查按田苗通計不失八九分以上收成奏入  
諭曰阿桂等辦理屯務甚屬可嘉交部議敘

八月初八日

諭曰阿桂奏稱追捕戕害德舒賊人塞卜騰霍濟格爾等至塔爾巴哈臺賊已經過戈壁亦未見哈薩克游牧蹤跡等語此等餘孽逋逃求活前往古爾班察爾想投向俄羅斯朕昨諭阿桂來年領兵巡察額爾齊斯等處當偵探此等賊人藏匿之處以大兵掩襲不可驚散或投入俄羅斯卽以不匿逃人之例曉示并云入境追擒於爾等毫無損害若能擒獻卽可回兵著傳諭知之

十二日

諭曰據末慶奏稱伊犁察卜沁臺員報稱牧放馬匹兵丁

六名夜間遇二十餘賊被擒者四人天明脫回告稱被賊帶至特克斯河釋放等語此四人已被賊擒豈肯釋回使我知其蹤跡著傳諭阿桂親往查訊若情節不實則因疎防一二瑪哈沁而妄言賊勢衆多致駭觀聽此風斷不可長卽以軍法從事此等賊人諒亦不能遠颺著派伊柱領兵百餘名從伊犁至穆蘇爾嶺一路搜捕務期肅清臺站毋令滋擾

二十一日奉

旨阿桂現在伊犁總辦事務著加恩補授都統

又

命賞園場所得鹿肉

九月十二日

公奏查看所收分數核算大約種糧一倍得收十  
餘倍二十倍不等奏入

諭曰據阿桂奏本年伊犁屯田以播種計之上地所獲二  
十倍中地所獲十倍足敷千餘人來年麥熟前之食將  
來增墾益多則需人益衆並請於開展廢員內遣原任  
副都統圖克善劉揚前來効力等語今年數百回人甫  
經耕墾卽收穫豐裕覽奏殊爲欣悅伊犁地廣屯田以  
多爲善其圖克善等俱著照所請發往若仍需人承辦

則烏魯木齊効力官員頗多著一面具奏一面調遣

又

諭曰阿桂奏稱固勒扎卡倫盤獲由哈薩克逃來之厄魯特男婦十名口又洪郭羅鄂博投入厄魯特三名俱解送阿克蘇交舒赫德辦理等語此等厄魯特人苦哈薩克役使陸續投來者必多與其徒煩解送不若卽畱伊犁等處令其牧放牲畜効力此次投來人等旣送往阿克蘇著傳諭舒赫德將阿克蘇所有之厄魯特通行體察其頑梗叵測者仍畱原處若攜有妻子無可疑情節來年卽發往伊犁交阿桂等酌於屯田牧馬差遣仍善

爲撫綏約束

二十四日

諭曰阿桂奏稱察卜沁臺站馬匹被竊派副都統豐訥亨等帶兵追襲迷蹤轉回行文開展烏魯木齊等處一併查拏其原遣官兵休息數日仍由珠爾都斯河源至阿勒坦呼斯坦等處搜捕等語此等瑪哈沁雖經豐訥亨等追襲迷蹤料不能遠遁著傳諭舒赫德安泰通行開展等處駐劄大臣等嚴飭各站官兵查拏務獲以清臺站

三十日

公奏言籌辦伊犁耕牧城守各事宜一請增派回人屯田查伊犁收穫不敷屯田回人一千戶之食本年現有屯田回人三百名近經舒赫德增派五百名已照例整裝於來年春起程仍有應派回人二百名請俟伊犁麥熟後遣發一請增派官兵駐防屯田查伊犁收穫通來年增派回人五百名計之可敷官兵二千五百名之食現有駐防滿洲索倫察哈爾兵八百餘名應增兵六百餘名屯田綠旗兵一百名應增九百名以上增兵一千五百名應陸續遣發一增派官兵請隨時酌量定數查屯



田回人一千計其收穫則壬午年卽敷官兵三千人之食加以綠旗兵一千則所收又倍應酌量定額以多駐馬兵於邊防有益如駐兵五千則馬三步二駐兵四千則減步兵一千一請次第建置城邑查伊犁要地河北則固勒扎河南則海努克其地土肥饒之處則察罕烏蘇應於海努克築城以回人三百名屯田用兵數百名駐防西通哈薩克布魯特及回地諸路察罕烏蘇築城以綠旗兵一千名屯田并駐防伊犁河北一路固勒扎須築大城凡駐劄大臣公署倉庫咸在以爲總漚其馬兵

於草青時分路巡查霜降以後各回汎地擬於壬午年夏季派綠旗兵一千名辦理令回人協助一年內竣事一豫備屯田兵馬駝現議增派綠旗屯田兵一千必須馬匹查烏魯木齊所易哈薩克馬六百匹尚不敷用應將陸續市易之馬令安泰等辦理千餘匹及查明哈密巴里坤有無馬匹應用其行裝駝隻查烏魯木齊尚有七百應揀選五百解送卽於伊犁收放從容往來轉運奏入

命軍機大臣議奏尋軍機大臣奏言伊犁屯田原應次第辦理除現在回人三百名外舒赫德又派回人五

百名於來春起程其續派之二百名仍令酌量若能一起前往甚善如不能則竟於秋收後發往庶回人不致竭蹶而伊犁糧石亦可節省至本年所收糧石既足官兵一千人之食則來年增墾可以類推應如阿桂所奏此項官兵於春秋二季分起調往其官兵額數酌以四五千名爲率但必隨時出派始不煩內地之力應俟來年秋收後再行酌定其駐防年限照從前成議更換又所奏建置城邑實爲邊防長久不獨地當衝要亦宜相其形勢物產查固勒扎地居曠野薪炭無資應於烏哈爾

里克察罕烏蘇哈什空格斯伯勒齊爾等木植多處或近山產煤之地築城駐兵仍令阿桂等再行勘定其海努克察罕烏蘇二城俱應如所奏辦理但另派綠旗兵一千築城未免張大其事且多浮費應令屯田綠旗兵於農隙次第興築不必定以年限又所奏屯田馬駝查所易哈薩克馬匹現議陸續解送烏魯木齊有駝七百隻即可選出五百俾運送一千人屯田器具至兵丁糧餉春初照初次遣兵例從阿克蘇辦給米麴羊隻麥熟後則但給以程途口糧並請嗣後添駐官兵總於烏魯木

齊阿克蘇調撥從之

十月十一日

公奏言

臣

等屯田伊犁因六月間稍旱又穀熟時

大風俱經祈禱山川今收穫豐登頗著靈應恭查山川之祀原有常經仰懇

皇上頒發祝文香帛於伊犁迤北之格登山迤南之額林哈畢爾噶山及伊犁河每歲春秋致祭永垂祀典其巡查所至名山大川並請臨時酌量致祭奏入得

旨如所請行該部照例辦理

十二日

諭曰據阿桂等奏稱明歲遣綠旗兵丁前往伊犁屯田應調派大員管轄烏魯木齊有達啓金梁同管屯田請將金梁分派伊犁等語烏魯木齊雖亦有屯田事務但事已就緒不比伊犁初次辦理且金梁素係兼管哈薩克貿易事哈薩克現聞伊犁屯田必驅牲隻前往可傳諭安泰明歲遣兵丁往伊犁時卽令金梁管領並傳諭阿桂知之

二十五日

諭曰阿桂奏稱凡出哈薩克布魯特陸續投來之厄魯特

應行遣往阿克蘇以供役使俟一二年後再調赴伊犁等語所見甚是可卽照此辦理

公奏言

臣

從前奏派副都統伊柱前往特穆爾圖

淖爾查勘布魯特等在納林阿特巴什等處耕種有無越界今據告稱八月二十六日至特穆爾圖淖爾有十數人蹤跡一見我兵放鎗數次旋即逃走比及追擒二人據供係布魯特車里克齊所屬採鐵至此因諭以爾等部落業經歸順一時不知官兵到來姑從寬宥次日卽派侍衛鐵柱佐領德勒克領兵十名前往納林九月初九日回營告稱

八月二十七日由巴勒渾嶺行八百里至納林河  
河兩岸俱有布魯特等游牧耕種隨有阿特巴什  
賞孔雀翎三品頂之布魯特頭目車里克齊等率  
衆接見呈送口糧羊隻并查掇放鳥鎗之屬人等  
解營請罪因諭以阿特巴什等處皆大兵平定準  
噶爾所得之地爾等不應游牧但爾情詞恭順應  
候大臣轉奏至納林北岸阿特巴什東岸則斷不  
可踰越該頭目等敬聽途酌賞緞疋遣回等語  
謹查阿特巴什等處舊係布魯特之地又在巴勒  
渾嶺之外去伊犁甚遠誠如



聖主洞鑒可以不須驅逐臣等每年巡查卽以納林阿特巴什爲界禁止侵越至該處距喀什噶爾雖近尚隔大山而附近之布魯特游牧更多亦可毋庸辦理奏入報

聞

十一月初九日

公奏言臣等前次會商舒赫德咨取烏魯木齊駝隻派綠旗兵五百名每名領運籽種一石行糧三個月送至伊犁今准安泰知會烏魯木齊有駝一千一百九十六隻甚屬寬餘應酌量每石加領籽

種五斗共七百五十石今年伊犁所種皆係黍粟  
來年籽種應酌帶大麥一百五十石小麥六百石  
又客商同德將巴里坤所購駝隻於來年青草時  
送至烏魯木齊以備二隊兵丁之用奏入報

聞

公又奏言伊犁兵丁日多錢糧日廣必須設立專  
管承辦請於烏魯木齊文職官員內派能幹滿員  
或同知縣令各一員雜職一員派送伊犁專理收  
放事務奏入

諭曰據奏需員料理承辦糧餉等語烏魯木齊現有發往

附錄卷一  
留駐人員著卽照所請令安泰卽行揀選於明春種地  
兵丁起身時同往烏魯木齊如尚需人員卽行文陝甘  
總督照例派撥前往並傳諭楊應琚知之

二十一日

公奏言伊犁土地肥壯明年復添設回戶兵丁收  
穫益爲豐裕軍實旣足城堡公署祠宇兵房亦可  
及農暇建造不惟不必費內地之力明年收糧之  
後亦可毋庸阿克蘇接濟奏入

諭曰阿桂奏本年屯田回人三百戶所收穀石接濟前後  
駐扎官兵及厄魯特回人二千餘口可至來年五月來

年再加增益開墾則建置城堡公署兵房等事次第可以舉行不必更需阿克蘇糧石等語今伊犁屯田已覺逾時尚能如此豐收皆阿桂盡心辦理所致著加恩從優議敘

又

諭曰據阿桂等奏稱蘇巴爾罕卡座解到投誠之厄魯特瑪哈沁巴雅爾等俱係數年前被布魯特擄掠之人現聞伊犁駐兵逃出投順請卽畱伊犁與兵丁一體支給口糧以備差遣所辦尚是但恐安插以後不免逃竄滋事著傳諭阿桂等令其嚴加約束如有偷竊馬駝逃竄

者卽行拏獲正法

十二月初二日

公奏言

臣

近派察哈爾營總烏巴什等領兵於各

路搜查瑪哈沁十月二十日回營告稱在阿勒坦

額默勒見有哈薩克三十餘人又伊犁河下游和

洛果斯見哈薩克十六人俱諭以伊犁現有駐劄

大臣令其前來投見

臣

等卽傳集侍衛官員公同

詢問據頭目赫德勒奎屯等俱稱上年在勒卜什

過冬今游牧千餘戶甫經移來等語

臣

阿桂諭以

勒卜什等處乃

天朝大兵平定之地豈可越境游牧卽著移回赫德勒等  
以天寒雪盛求於來春遷移臣等諭以爾等私行  
游牧卽應治罪姑念業爲

大皇帝臣僕且一時無知誤入今給爾印文回報該頭目  
限十日遷移倘仍復遲延卽發兵驅逐隨遣令起  
程一面派兵二百名令副都統伊柱帶領前往驅  
逐臣阿桂前遣侍衛碩通領兵五十名搜捕瑪哈  
沁卽令其會合接應奏入報

聞

十六日

諭曰阿桂奏據哈薩克等告稱伊等使人拜克奈回至游牧會言大皇帝加恩將愛古斯等處賞給我等游牧等語從前哈薩克使人入覲奏請在塔爾巴哈台游牧朕卽面諭不允又載入勅書此特哈薩克等希圖僥倖造言生事現在納旺等帶領哈薩克使人將至京師朕仍以阿桂所奏哈薩克等造言生事之處再行申諭並勅駐劄大臣嚴行驅逐著傳諭知之

二十六日

公奏言從前察卜沁臺站馬匹被瑪哈沁盜竊副都統豐訥亨領兵一百名追至珠爾都斯因風雪

迷蹤轉回

臣

仍令豐訥亨再往搜捕十一月二十

一日據回報十月初四日至阿爾薩拉圖見有馬  
跡卽令厄魯特藍翎侍衛塞卜騰署叅領伊屯索  
倫署防禦額特訥等尋蹤追逐豐訥亨等向哈爾  
巴琿河令巴圖魯侍衛翹蘇爾堵截遇數賊爲塞  
卜騰等擊敗隨尾追至夜賊棄馬登山翹蘇爾塞  
卜騰伊屯額特訥攻圍射殺賊四人擒賊一人豐  
訥亨遂過察爾圖嶺十五日翹蘇爾同藍翎隊長  
德爾塞行至烏納哈特嶺遇賊二十餘人擒獲五  
人詢係偷竊臺站馬匹之瑪哈沁豐訥亨等隨往



接應翹蘇爾餘賊固守山險復攻潰擒獲數賊供稱有瑪哈沁在哈爾札卜藏匿二十三日行至哲爾圖捉生詢問知賊在圖爾根河隨舍馬步行追入藍翎隊長特英額索倫兵哈濟噶爾斗濟勒圖等遇賊擊敗窮追兩晝夜沿途斬獲賊人於特勒克等處覓得賊蹤十一月十一日翹蘇爾等攻奪賊人馬羣詢知賊人特固斯孟克在伊克特勒克河源藏匿往阿圭雅斯打牲日內卽回因分三路往迎十二日翹蘇爾等遇特固斯孟克奔逃協力擒獲計擒剿瑪哈沁男婦七十餘人獲馬五十餘

匹<sub>臣</sub>阿桂等研訊特固斯孟克供係綽羅斯台吉  
昂吉岱之異母兄從哈薩克逃回偷竊臺站馬匹  
是實等語<sub>臣</sub>等查該犯屢拒官兵罪不可逭卽同  
擒獲之得木齊巴朗等正法其所獲馬匹補給臺  
站奏入

諭曰據阿桂奏豐訥亨等領兵搜捕瑪哈沁擒獲偷竊臺  
站馬匹之庫木諾雅特台吉特固斯孟克等語阿桂豐  
訥亨此次搜捕逸賊奮勉可嘉著交部議敘

又

諭曰阿桂此次辦理瑪哈沁甚合機宜今值天寒雪盛瑪

哈沁等無處棲身必四散奔走自應不時派兵搜捕但搜捕亦豈能淨盡今伊犁現議編設佐領管束厄魯特等仍應廣爲招撫俾其來投可以肅清地方併省派兵搜捕之力著傳諭阿桂等出示曉諭此時瑪哈沁等能悔罪來投卽行收養若負固藏匿則擒殺無赦於各處要路張掛悉使聞知可酌量辦理

公又奏言現在伊犁所有厄魯特及來年自阿克蘇肅州送到之厄魯特等共百餘名將來藏匿哈薩克布魯特人等聞安插之信必陸續來投若無管束章程非經久之計請嗣後來投之厄魯特等

滿百人則編爲一佐領揀選佐領一員驍騎校一員領催四名管束更換日期將在京及察哈爾居住之厄魯特侍衛等揀選派出新舊參用三年一換兵丁著有勞績者給與錢糧新經來投之人但給與口糧候補跟役家口等酌給籽種牛羊下軍機大臣議行

公又奏言查伊犁駐兵屯田糧餉馬匹俱可不煩內地之力卽貨物亦不過酌給鹽菜銀兩購買緞疋及紙筆等物所難得者牛羊駝隻布疋茶葉耳牛羊之辦解不無煩費駝隻之倒斃亦難購補以

牧羣可永遠孳息再辦駝二千隻畱一千二百隻於巴里坤爲換班兵丁馱載遣往伊犁自伊犁撤回兵丁之駝則於巴里坤牧放以待下次換班其傷損必少查喀爾喀等旗牛羊尚覺充裕駝隻亦多似可酌量採買至烏里雅蘇台存貯布疋茶葉頗多亦請於解駝時酌量足敷官兵之用就便馱載抵扣鹽菜銀兩則公餉可省而私用亦便經軍機大臣議奏伊犁駐兵屯田所需牲隻每年採買解送實屬煩費

臣等欽奉

諭旨將達里岡愛商都達卜遜淖爾等處牧羣牲畜業經  
定議揀選解送伊犁阿桂等所請於喀爾喀採買  
之處應無庸議但臣等原議馬二萬匹駝一千隻  
牛六千隻羊六萬隻與阿桂等籌辦之數不符應  
請停其解送馬匹其牛羊則照所奏之數發往至  
駝隻既不必全行解送亦自可陸續購買請仍照  
原議先送一千隻再令巴里坤哈密大臣等購買  
足數以備換班之用至布疋茶葉爲官兵所必需  
烏里雅蘇台存貯雖多未免遠隔且駝隻既由巴  
里坤哈密購買應請卽將此兩處存貯茶葉布疋

輕裝運送前往其辦送牛羊酌量分羣派兵陸續  
照管起程及官兵行糧整裝銀兩臣等與總管巴  
爾品會商續奏奏入

上從之

十二月議開墾功奉

旨交部議敘

是年西陲底定自元臣及在事將軍參贊禁衛統  
領諸臣第其勲績

命圖形紫光閣五十功臣像公位列十七

恭錄

御製贊

參贊大臣工部侍郎阿桂

阿克敦子性頗敏健力請從戎宜哉惟允身不勝衣心可  
干城楚材繼出爲國之楨